

KERATAN AKHBAR-AKHBAR TEMPATAN
TARIKH: 8 JULAI 2015 (RABU)

Bil	Tajuk	Akhbar
1.	Sektor penjagaan kesihatan, kesejahteraan diri akan beri impak terhadap ekonomi Malaysia – Ewon Ebin	BERNAMA
2.	Persidangan, Pameran Bioekonomi ASEAN 17 – 19 Ogos	Utusan Malaysia
3.	Kit rumah perlindungan penyelesaian efektif wabak denggi – Naib Canselor UKM	BERNAMA
4.	RM180.76 juta jumlah dana, geran MTDC untuk diagih	Berita Harian
5.	Gempa bumi lemah 2.6 richter landa Ranau pagi ini	BERNAMA
6.	Gempa bumi kuat landa Timur Kepulauan Kuril	BERNAMA
7.	Pembenihan awan dilakukan jika kemarau berlarutan - Jabu	BERNAMA
8.	Cuaca kering dijangka sehingga Sept	BERNAMA



Sektor Penjagaan Kesihatan, Kesejahteraan Diri Akan Beri Impak Terhadap Ekonomi Malaysia - Ewon Ebin

PUTRAJAYA, 7 Julai (Bernama) -- Persidangan dan pameran BioMalaysia & ASEAN Bioekonomi 2015 akan memperkenalkan aspek perniagaan-kepada-pengguna, dengan memberi fokus kepada penjagaan kesihatan dan bioproduk kesejahteraan diri yang memberi impak besar terhadap ekonomi Malaysia dan rantau ASEAN.

Menteri Sains, Teknologi dan Inovasi Datuk Dr Ewon Ebin berkata sektor itu mampu merentasi pelbagai industri serta berpotensi mentransformasi Malaysia menjadi ekonomi berpendapatan tinggi, inklusif dan lestari.

Katanya memandangkan pasaran kesejahteraan diri kini mencecah nilai US\$3.4 trilion, ia menggalakkan peluang perkongsian dalam kalangan peserta Malaysia, ASEAN dan global.

"Ini akan mendorong terbentuknya perkongsian bagi melonjakkan inovasi dan pertumbuhan dalam sektor berasaskan bio, dengan tujuan menjadikan Malaysia kuasa gergasi bioekonomi pada masa akan datang," katanya pada sidang media di sini Selasa.

Malaysia akan menjadi tuan rumah persidangan dan pameran tiga hari itu, yang bertemakan 'ASEAN Bioeconomy: Biodiversity to Wellness' (Bioekonomi ASEAN: Biodiversiti Untuk Kesejahteraan Diri) bermula 17 Ogos, dan dijangka menarik lebih 10,000 pelawat perdagangan serta 250 pempamer termasuk sebuah pavilion antarabangsa daripada Majlis Kerjasama Teluk (GCC).

Ewon berkata Malaysia, sebagai pengerusi semasa ASEAN, juga akan mempamerkan teknologi, inovasi dan produk terkininya daripada 250 syarikat bioteknologi.

"Tahun ini, kita akan melihat lebih banyak perubahan menarik terhadap unsur-unsur persidangan ini dan satu daripada perubahan besar itu ialah kemunculan Bioekonomi ASEAN, yang pasti menggalakkan pertumbuhan industri berasaskan bio serta memberi manfaat ekonomi kepada rantau ini," katanya.

Selain sektor penjagaan kesihatan dan kesejahteraan diri, persidangan itu juga akan memberi fokus terhadap bioekonomi di rantau ASEAN, yang boleh menjadi 'pengubah permainan' bagi menghadapi cabaran ekonomi di rantau itu.

"Acara ini akan menawarkan kepada Malaysia gerbang untuk memasuki bioekonomi ASEAN serta mewujudkan persekitaran lebih kukuh, holistik dan bersepadu bagi membolehkan bioekonomi berkembang maju di rantau ini," kata Ewon.

KERATAN AKHBAR
UTUSAN MALAYSIA (DALAM NEGERI) : MUKA SURAT 3
TARIKH : 8 JULAI 2015 (RABU)

Persidangan, Pameran Bioekonomi ASEAN 17-19 Ogos

PUTRAJAYA 7 Julai - Kementerian Sains dan Teknologi (MOSTI) akan menganjurkan Persidangan dan Pameran Bioekonomi ASEAN pada 17 hingga 19 Ogos ini di Pusat Dagangan Dunia Putra (PWTC).

Menterinya, Datuk Dr. Ewon Ebin berkata, bertemakan Biodiversiti Untuk Kesihatan, persidangan itu menyasarkan sebanyak 10,000 pengunjung dengan kira-kira 250 pempamer dari negara-negara ASEAN.

Beliau berkata, Timbalan Perdana Menteri, Tan Sri Muhyiddin Yassin dijangka merasmikan persidangan yang akan berlangsung selama tiga hari itu.

"Persidangan Bioekonomi yang merupakan jalinan kerjasama dengan para peserta global berpotensi meletakkan Malaysia sebagai antara penggiat bioekonomi ternama, selain dapat memacu pertumbuhan dalam sektor inovasi.

"Persidangan tahun ini akan memperlihatkan perubahan dalam beberapa elemen Bio-Malaysia. Salah satunya kemasukan bioekonomi iaitu sektor yang menjadi sasaran untuk menggalakkan pendapatan negara dan rantau ini," katanya dalam sidang akhbar di sini hari ini.

Ewon berkata, sebagai negara pertama di Asia Tenggara dan kedua di Asia yang melibatkan diri dalam sektor bioekonomi, pelbagai faedah sosioekonomi diperoleh negara terutama dalam aspek pembangunan.

Beliau berkata, persidangan kali ini memberi banyak kelebihan kepada negara memandangkan industri Biotechcorp akan menyambut ulang tahun yang ke-10 dan Malaysia pula merupakan Pengerusi ASEAN 2015.

Menurutnya, penglibatan negara anggota ASEAN termasuklah Brunei, Indonesia, Laos, Myanmar, Filipina, Singapura, Thailand dan Vietnam dalam persidangan itu amat dinanti-nantikan.



Kit Rumah Perlindungan Penyelesaian Efektif Wabak Denggi - Naib Canselor UKM

BANGI, 7 Julai (Bernama) -- Kit Rumah Perlindungan Lengkap Denggi berupaya menjadi penyelesaian efektif kepada pengawalan denggi sekali gus menghapuskan wabak denggi di seluruh negara, kata Naib Canselor Universiti Kebangsaan Malaysia (UKM) Prof Datuk Dr Noor Azlan Ghazali.

Kit tersebut adalah hasil penyelidikan [Inno Biologics Sdn Bhd](#) dan Entogenex Industries Sdn Bhd mengandungi biolarvicide MOUSTICIDE yang dapat membunuh larva nyamuk, losyen penghalang nyamuk dan perangkap Ovi Larva Aedes itu, direka khas untuk membunuh sistem pembiakan nyamuk, katanya.

"Kit ini telah terbukti berkesan membunuh nyamuk di negara seperti Filipina, Thailand dan Vietnam dalam tempoh satu hingga dua bulan," katanya selepas menandatangani perjanjian kerjasama tiga hala UKM, Inno Biologics dan Entogenex merangkumi inovasi, penyelidikan dan pembangunan perusahaan di sini hari ini.

Perjanjian itu berasaskan konsep 'Triple Helix' iaitu kolaborasi antara pihak akademik-industri-kerajaan disaksikan oleh Pengarah Eksekutif EntoGenex Industries dan Pro Canselor UKM, Tun-ku Naquiddin Tuanku Ja'afar.

Inno Biologics dan Entogenex bersama [Kementerian Sains, Teknologi dan Inovasi \(MOSTI\)](#) sedang menjalankan projek perintis Komuniti Bebas Denggi (KBD) di beberapa kawasan yang berisiko tinggi melibatkan Selangor, Kuala Lumpur dan Johor bermula bulan ini.

Noor Azlan berkata kempen KBD merupakan program impak sosial untuk kawalan denggi yang ditubuhkan dengan gabungan inovasi bioteknologi dengan penglibatan masyarakat yang berkesan.

Sebagai permulaan, katanya, sebanyak 110,000 kit Rumah Perlindungan Lengkap Denggi akan diedarkan secara percuma kepada orang ramai di tiga negeri itu, dengan sasaran dapat mengurangkan kes denggi dalam masa setahun.

Noor Azlan berkata UKM akan menubuhkan Makmal Penyelidikan untuk menjadi sumber pengetahuan untuk denggi serta teknologi pengawalan denggi dalam masa terdekat.

-- BERNAMA

RM180.76 JUTA JUMLAH DANA, GERAN MTDC UNTUK DIAGIH

» *Bantu syarikat teknologi
perluas pasaran,
tingkat daya
saing global*

Oleh Mohd Zaky Zainuddin
zaky@bh.com.my

Malaysian Technology Development Corporation (MTDC) masih memiliki peruntukan dana dan geran berjumlah RM180.76 juta tahun ini untuk disalurkan kepada lebih 50 syarikat berkaitan teknologi di Malaysia.

Ketua Pegawai Eksekutifnya, Datuk Norhalim Yunus, berkata peruntukan disalurkan menerusi lima dana itu adalah penyelesaian lengkap syarikat teknologi tempatan, bermula daripada syarikat permulaan hingga meluaskan ke pasaran antarabangsa.

Katanya, penyediaan dana dengan mod kewangan berbeza itu menjadikan apa yang ditawarkan MTDC adalah ekosistem instrumen lengkap untuk syarikat teknologi Malaysia yang mempunyai potensi serta kemampuan untuk berkembang di peringkat domestik dan antarabangsa.

Tingkat teknologi

"Ekosistem lengkap ini bagi memastikan syarikat teknologi tempatan mendapat dana dan geran bersesuaian untuk membangun serta memacu pertumbuhan syarikat menjadi sebuah firma teknologi berdaya saing.

"Ia untuk membantu syarikat Malaysia sejajar dengan visi 2020 kami iaitu meningkatkan teknologi dalam syarikat di negara ini," katanya ketika ditemui BH, baru-baru ini.

Ketika ini, MTDC juga mempunyai beberapa inkubator menerusi kerjasama dengan beberapa universiti tempatan dan agensi kerajaan iaitu UTM-MTDC, UPM-MTDC, UKM-MTDC, FRIM-MTDC dan UiTM-MTDC.

Mengulas lanjut, Norhalim berkata, bagi dana BSF, MTDC

meluluskan dana berjumlah RM21 juta kepada syarikat permulaan berkaitan teknologi yang terdiri daripada pinjaman mudah bercagar yang boleh ditukar kepada Saham Keutamaan Boleh Tukar Boleh Tebus Terkumpul (RCCPS).

Katanya, syarikat permulaan yang mempunyai produk inovatif layak memohon dengan dana maksimum RM5 juta.

TAF menawarkan dana berjumlah RM18 juta yang mana syarikat teknologi Malaysia boleh memohon untuk tujuan mengambilalih teknologi asing bagi dipraktikkan dalam aktiviti pembuatan syarikat membabitkan nilai maksimum RM4 juta atau 50 hingga 70 peratus bagi perbelanjaan syarikat.

Bagi BGF pula, MTDC meluluskan dana berjumlah RM15.8

juta bagi membantu syarikat dengan potensi pertumbuhan kukuh yang dapat menarik pelaburan daripada modal teroka swasta dan institusi kewangan lain. Nilai maksimum adalah RM7 juta termasuk sehingga RM1 juta dalam bentuk geran.

MTDC lulus CRDF RM77j

Norhalim berkata, MTDC meluluskan CRDF berjumlah RM77 juta untuk syarikat teknologi melaksanakan pengkomersialan projek penyelidikan dan pembangunan (R&D) yang sudah berjaya oleh universiti awam serta swasta, institusi penyelidikan dan syarikat tempatan lain.

Katanya, dana itu memberi tumpuan kepada teknologi termasuk bahan maju, pembuatan terkini, peralatan dan mesin, bahan baharu, elektrik dan elektronik, teknologi nano dan tenaga alternatif membabitkan jumlah RM500,000 hingga RM4 juta.

"Bagi BEF pula, sebanyak RM75 juta diluluskan bagi membantu syarikat teknologi Bumiputera berasaskan teknologi untuk mengembangkan perniagaan di peringkat tempatan dan global," katanya.

Setakat ini, MTDC sudah menyalurkan RM23.04 juta kepada 11 syarikat menerusi lima dana atau geran yang diperkenalkan itu yang mempunyai peruntukan keseluruhan berjumlah RM203.8 juta bagi tahun 2015.

INFO

5 dana dan geran ditawarkan MTDC

- © Dana Pemerolehan Teknologi (TAF)
- © Dana Pengkomersialan dan Dana Penyelidikan dan Dana Pembangunan (CRDF)
- © Dana Pengembangan Perniagaan Bumiputera (BEF)
- © Dana Permulaan Perniagaan (BSF)
- © Dana Perkembangan Perniagaan (BGF)

*"Ekosistem lengkap ini bagi memastikan syarikat teknologi tempatan **mendapat dana dan geran bersesuaian** untuk membangun serta memacu pertumbuhan syarikat"*

Norhalim Yunus,
Ketua Pegawai Eksekutif MTDC





Gempa Bumi Lemah 2.6 Richter Landa Ranau Pagi Ini

KUALA LUMPUR, 7 Julai (Bernama) -- Gempa bumi lemah berukuran 2.6 pada skala Richter melanda Ranau, Sabah pada 9.26 pagi ini.

Jabatan Meteorologi Malaysia dalam satu kenyataan berkata pusat gempa terletak di enam darjah utara dan 116.6 darjah timur, 12km barat laut dari Ranau.

"Gegaran dirasai di Ranau," kata kenyataan itu di sini Selasa.

Jabatan Meteorologi Malaysia kini memantau perkembangan dan sebarang maklumat terkini akan dimaklumkan.

Pada 5 Jun lepas, Ranau digegarkan dengan gempa bumi sederhana berukuran 5.9 pada skala Richter dengan meragut 18 nyawa pendaki dan malim gunung di Gunung Kinabalu.

-- BERNAMA



Gempa Bumi Kuat Landa Timur Kepulauan Kuril

KUALA LUMPUR, 7 Julai (Bernama) -- Gempa bumi kuat berukuran 6.4 pada skala Richter melanda timur Kepulauan Kuril pada 1.27 petang ini.

Jabatan Meteorologi Malaysia dalam satu kenyataan di sini berkata pusat gempa itu ialah 465km timur laut Asahikawa, Jepun dan 5,130km timur laut Kudat, Sabah.

Tiada ancaman tsunami dilaporkan, kata kenyataan itu.

-- BERNAMA



Pembenihan Awan Dilakukan Jika Kemarau Berlarutan - Jabu

KUCHING, 7 Julai (Bernama) -- Pihak berkuasa berkaitan seperti Tentera Udara Diraja Malaysia (TUDM) dan Jabatan Meteorologi diminta bersiap sedia untuk melakukan pembenihan awan sekiranya musim kemarau di Sarawak sekarang, berlarutan.

Timbalan Ketua Menteri Tan Sri Alfred Jabu Numpang berkata ketika ini, pembenihan awan tidak perlu dilakukan dan bekalan air akan dihantar ke sekolah, kampung, rumah panjang dan tempat lain yang kekurangan air.

"Kami membuat pemantauan terhadap bekalan di Kuching dan mendapati tiada apa yang perlu dibimbangkan ketika ini, manakala langkah luar jangka telah disusun semua jabatan berkenaan, termasuk lembaga air dan Jabatan Kerja Raya," kata Jabu yang juga Pengerusi Jawatankuasa Pengurusan Bencana negeri pada sidang media di sini Selasa.

Beliau memberi jaminan pengguna akan mendapat bekalan air mencukupi pada musim kering ini, yang dijangka berlarutan sehingga September.

Semua pejabat residen di negeri ini juga mempunyai plan luar jangka masing-masing mengikut prosedur operasi standard (SOP), yang memberi keutamaan kepada kawasan yang mengalami kekurangan bekalan air pada musim perayaan Aidilfitri.

"Di kawasan yang sukar untuk disediakan bekalan air, Jabatan Kabajikan telah diminta menambah bekalan air minuman daripada empat kotak kepada 10 kotak bagi setiap keluarga untuk memastikan tidak berlaku kekurangan bekalan air pada musim perayaan," katanya.

Menurut Jabu, Lembaga Air Kuching (LAK) yang berpengalaman luas dalam memantau dan mengurus keperluan bekalan air, mempunyai kaedah baharu untuk menambah bekalan air bagi menampung sumber air Jabatan Kerja Raya.

Katanya pihak berkuasa lain termasuk Jabatan Kesihatan juga diletakkan dalam keadaan bersiap sedia dengan plan masing-masing bagi mencegah merebaknya penyakit.

-- BERNAMA



Cuaca Kering Dijangka Sehingga Sept



Gambar Hiasan

KUCHING, 7 Julai (Bernama) -- Cuaca panas dan kering di Sarawak terutama di bahagian barat dan utara negeri ini dijangka berterusan sehingga September ini.

Menurut **Jabatan Meteorologi Malaysia (JMM)**, **Sarawak** dijangka menerima taburan hujan sedikit di bawah normal dengan jumlah hujan bulanan di dalam julat 150mm hingga 300mm.

Sehubungan itu, mesyuarat Jawatankuasa Pengurusan Bencana Negeri (JPBN) Sarawak mengarahkan agensi dan jabatan kerajaan mengambil tindakan proaktif bagi menghadapi kemarau dan jerebu di negeri ini.

Mesyuarat yang dipengerusikan Timbalan Ketua Menteri Sarawak Tan Sri Alfred Jabu Numpang hari ini, turut meminta penyedia bekalan air seperti Lembaga Air Kuching (LAK) dan Jabatan Kerja Raya (JKR) merangka persiapan pelan luar jangka jika berlaku kekurangan bekalan air.

Sementara itu, kenyataan yang dikeluarkan Sekretariat Jawatankuasa pengurusan Bencana Negeri Sarawak hari ini, turut meminta JMM, Jabatan Alam Sekitar dan Lembaga Sumber Asli dan Alam Sekitar untuk sentiasa memantau keadaan semasa.

Orang ramai khususnya di kawasan yang sering menghadapi masalah kekurangan air semasa musim kemarau turut dinasihatkan membuat persediaan awal bagi menghadapi keadaan tersebut.

JPBN juga meminta orang ramai tidak membazirkan bekalan air di dalam kehidupan seharian dan pada masa sama, mengelakkan pembakaran terbuka bagi menghindarkan risiko kebakaran penempatan dan hutan yang boleh mengakibatkan jerebu.

Orang ramai juga diminta segera melaporkan sebarang kejadian kebakaran hutan kepada pihak berkuasa.

Menurut kenyataan itu juga, cuaca panas dan kering boleh menjejaskan kesihatan dan orang ramai dinasihatkan sentiasa mengambil langkah perlu bagi mengelak kesan strok haba dengan meminum air yang mencukupi.

-- BERNAMA